

ANALISIS DI CARNAVAL 1997 (I)

Pa Jubi Naar

A DRENTA EPOCA NOBO

Awe tur hende ta sperando manera custumber e analisis di Carnaval.

Lamentablemente, e aña aki, e analisis lo no ta manera tur e añanan anterior, ya cu mi ta considera cu "un epoca turbulento" ta tras di lomba y cu a bira tempo pa cuminsa cu un "epoca nobo".

E epoca nobo aki ta depende hopi di e "Comision Vision 2000" di SAC y di ASOMA.

E responsabilidad mas grandi actualmente ta den man di e Comision conoci como "Comision di vigilancia".

Aruba Quality Foundation a ser funda algun aña pasa cu e meta pa trece calidad den local nos ta haciendo, pa mehora servicio, y muestra riba responsabilidadnan y asina por sigui.

Pa Carnaval tambe nos mester pereura pa trece calidad y mantene esaki, mehora e carnaval y cu tur hende involvi trahando cu responsabilidad y cu seriedad. Carnaval a stagna hopi aña pasa.

Tur cos a keda pega riba e mes cosnan di semper.

No tabata tin inovacion, no tabata tin mehoracion, y e responsabilidad a paraliza te cu e seriedad a bay perdi.

Si no ta pa gruponan di carnaval, sigur lo no tabata tin parada diadomingo.

Si tabata tin mes, sin e gruponan cu a participa, ta un verguenza pueblo Arubano lo a haya riba caya bao di nomber di carnaval.

APERTURA DI CARNAVAL

Pa papia riba e carnaval cu a pasa y kico mester wordo haci, sigur lo dura dos siman largo of mas, usando dos pagina completo di DIARIO tur dia.

Esaki sigur mi no ta haci den e analisis.

Tur hende riba nos isla tin nan ideanan di kico mester wordo haci, kico mester cambia si bay tras di tur comentarionan na radionan segun yamadan, y den corantanan.

Tur local mester cambia ta conoci, y kico lo mester haci tin hendenan ta traha ariba. E hendenan aki ta di e "Comision di Vigilancia di Gobierno" cu ta consisti di figuranan di tur sector cu ta

envolvi cu carnaval.

Un di e aspectonan cu mester tira bista ariba ta e "Comienzo di Carnaval" y aña tras aña mi a bisa cu esaki mester ta un actividad grandioso pa comunidad y nos bishitantenan por disfruta di dje.

ELECCION PRINS Y PANTHO A DESAPUNTA

Despues di e comienzo di carnaval a bira un custumber cu ta cuminsa cu eleccion di Prins y Pantcho como prome actividad.

Nunca antes pueblo a mira eleccion di Prins y Pantcho tuma lugar manera e aña aki, cu un eleccion a sigui otro, pa tres eleccion riba un anochi y cu e cantidad di participantenan hunto, no a yega ni na un bon anochi di un solo eleccion di prins y pantcho. E nivel mes atrobe no tabata cos di gaba.

Kico mester ser haci ?

Esey ta keda den man di e evaluacion di e comision di gobierno den su rapport, pa dicidi si nan ta di acuerdo cune, si mester bini cambio, y kico lo por haci pa futuro. Mi no ta papia mas di SAC pero di Comision Vision 2000.

SAC ta SAC y SAC lo sigui como SAC te ora cu SAC mes dicidi cu e no ta SAC mas, y tur hende sa esey tambe.

Cu eleccionnan di prins y pantcho mester bay bao di microscopio ta sigur.

CALYPSO-TUMBA

Aña tras aña ultimo casi 15 aña anualmente tabata tin problema entre SAC y ASOMA encunto organizacion di e festivalnan aki. E conflicto aki a yega te na e punto e aña aki atrobe, cu gobierno mester a cay aden. Ministro Lili Beke a mira e mal direccion cu tabata bayendo, y a institui e Comision cu a delibera cu e dos otro partidonan cu asina por a scapa e dos eventonan aki.

Ainda cu e rescate aki, e concurso di calypso-road-march, por poco a termina cu fin amargo, y tabata ministro Beke atrobe cu intermediacion di prome ministro Eman, cu a logra scapa e actividad.

Tur esaki no mester a yega asina leeuw, y pa futuro, ASOMA tin hopi cambio pa haci den su maneho relaciona cu e concursonan y

SAC tambe tin huiswerk pa haci, mientras cu "Comision Vision 2000" tin un trabao inmenso pa percura pa e problemanan aki ta tras di lomba pa semper.

E anochi di tumba cu tabata un anochi historico tambe a haya su golpi ora cu ningun di e dos canalnan di television a transmiti of graba.

E anochi aki tambe tabata tin su conflictonan cu a cuminsa den dia caba cu un emisora, sigui anochi cu malcontento di otro emisoranan y cu e no grabacion of transmision di parti television.

Esaki tambe mester bay bao di microscopio di Comision Vision 2000.

ELECCIONNAN DI REINA

Si scucha e malcontentonan, kehonan y criticanan cu tin riba eleccion di reinanan di organizacionnan, clubnan, distritonan, ta bira tempo pa hinca esakinan tambe bao di microscopio.

E kehonan den nan mayoria tabata riba asunto di patrocinio, y di eleccionnan di distrito, e falta di cooperacion di comercio den e distritonan pa yuda nan.

Comercio en general tambe a wordo critica pa e falta di cooperacion.

Pesey aki tambe e "Comision Vision 2000" tin un tarea, y pa yega na un forma organiza y coordina cu sectoman comercial, pa por yega na un mihor reparticion di patrocinio pa reinanan.

ELECCIONNAN DI REINA DI CARNAVAL

E tres eleccionnan di Reina di Carnaval no a keda sin nan critica tampoco.

Esun di muchanan principalmente riba e horario di comienzo y terminacion. Eleccion di reina di carnaval di mucha mester ta un eleccion caminda e ora final mester ta un ora aceptable y no 11 or of 12 onochi.

Reglamentonan pa e eleccionnan aki y participacion mester wordo traha di nobo. E papel di SAC cu 8 pa 9 reglamento cu nan ta menciona, no ta nada di local reglamentonan mester ta. Tin mucho espacio habri pa tur sorto di manipulacion. E comision mester revisa esaki por completo y traha

na mes momento riba reglamentonan y stipulacion nobo.

Si mira bon, nada di e presentacion oficial di 5 Minuut no ta wordo cumpli cune.

Un ta mantene su mes na 5 minuut y tur otro na 5 pa 20 of mas minuut.

E stipulacionnan mester ta pa cada un y si nan no cumpli, ta kita punta of descualifica.

Mester bini seriedad den e eleccionnan aki.

Local mester pone un fin tambe na dje ta "e negoshi den e negoshi" di eleccionnan.

Esaki lo mi trece dilanti na Comision Vision 2000 como un asunto apart.

GASTONAN ENORME PA MAYORNAN

No mester ta asina cu pa un mucha muher participa na un di e eleccionnan aki, mayoman tin cu hinca nan mes den gastonan di 4 mil florin pa 70 mil florin.

Esaki ta trece cune cu e eleccionnan ta bira pa un grupito selecta so y no pa tur hende.

Familianan cu hasta ta hipoteca nan cas pa nan yiu por sali reina.

Familianan cu ta busca prestamo di miles di florin cu añanan largo di paga y cu

nan yiu ta perde eleccion tambe riba dje.

Pa Prins y Pantcho tambe no mester ta asina cu pa un pareha bira Prins y Pantcho, nan ta haya nan mes den algun mil florin di gasto.

Tur esakinan ta cosnan pa analisa y profundamente y trece cambio den nan.

GRUPONAN DI CARNAVAL

E contento cu mi a bira, ta di tende di e entusiasmo cu tin cerca hopi hende pa formacion di gruponan nobo di Carnaval pa futuro.

Pero tur a expresa tambe di ta spera cu "Comision Vision 2000" lo percura pa e cambionan necesario y pa mitar di aña tur hende sa unda nan ta para.

Ta pesey mi ta bisa cu si e trabao aki no resulta exitoso, si no bini e cambionan cu e pueblo carnavalesco ta spera, carnaval di Aruba ta dal abao.

E aña aki e gruponan a mula curpa atrobe pa por yega den parada.

Tabata tin problema atrobe relaciona cu musica pa parada.

Den pasado contract ta ser kibra di banda di e agrupacion musical pa motibo cu nan a haya grupo cu ta ofrece nan mas placa.

Contract ta wordo kibra di parti di agrupacion musical pasobra nan kier mas placa na lugar di loke nan a combini.

E aña aki tabata tin problema atrobe entre grupo di carnaval y un agrupacion musical, local tambe tabata draai rond di placa.

Pesey mi ta contento cu ASOMA a dicidi di reuni cu agrupacionnan musical pa yega na un formula di tarifa pa bandanan grandi, mediano y chiquito.

Di brassband y e Soundsystemnan mi no tin keho ni critica pasobra te ainda nan ta masha razonable cu tarifa, segun mi tin entendi, aunque nunca mi a puntra kico nan ta cobra.

Gruponan di carnaval ta corazon, cerebro y sanger di nos carnaval.

E situacion a bira cu ta masha dificil pa mantene gruponan di carnaval, si nan no ta organiza.

E unico cu mi sa di dje cu ta organiza por completo ta "Los laga bay" y apesar di e bon organizacion aki, nan tambe tin kibramento di cabez pa mantene e grupo.

Di otronan mi no por bisa ki organiza nan ta como grupo y miembronan pero si mi sa cu mayoria, -- principalmente si bo kier ta grandi y luhoso, -- ta cremencha cu local nan tin pa por keda na bida.

Aki tambe tin un tarea pa "Comision Vision 2000" y mi ta sigur cu lo por yega na hopi bon durante e aña aki pa gruponan di carnaval.

PARADANAN DI CARNAVAL

Hopi a wordo papia di cambio di ruta of no cambio di ruta, y problemanan cu tin cu esaki.

Pa yega na esaki, lo ta bon pa gruponan di carnaval ta organiza, y cu lo tin un comision di e gruponan aki cu lo por papia cu organizadoman riba kico NAN (e gruponan di carnaval) ta desea.

Ta nan ta gasta placa pa e parada, ta nan ta mula curpa dunando e publico un show di carnaval, ta nan ta pasa den e dolor di parada y ruta.

Sigui lesa pag. 53

cont. pag. 52

ANALISIS DI CARNAVAL

E gruponan mester por tin algo di bisa relaciona cu ruta y kico nan ta desea.

E asunto di kavel canto di e ruta tambe ta birando un dolor di cabez y aña tras aña esaki ta bira e dolor mas y mas, te dia e bira un pustema y haya infeccion. Asunto di kavel mester bin riba mesa atrobe y wordo discuti profundamente prome cu dicidi cu otro aña en adelante lo tin of lo no tin kavel pa traileman etc.

JUMP-UP NAN CU A BAY PERDI

Loke a bira "jump-up" den transcurso di añanan, antes tabata e asina yama "Old mask Parade".

Un parada den cual e participantenan ta bisti disfraznan bieuw y participa aden.

Despues a bini e jump up nan den barionnan, cu a wordo para pa polis.

Otro lo bisa cu ta SAC a para nan, y otro lo bisa atrobe cu ta polis a para esaki riba recomendacion di SAC of SAC a para nan riba recomendacion di polis.

Jump up nan semper tabata un atraccion y momento di diverticion pa esnan cu ta bula aden y pa mirones.

Casi diez aña caba cu mi ta bisa: "Carnaval no ta di pueblo mas. Carnaval no ta di SAC, pero cu Carnaval ta di polis cu ta dicidi".

Polis a tuma Camaval over di un manera cu ningun hende ni grupo ni organizacion tin algo mas di bisa. Actividad ta tuma lugar si polis kier y si polis no kier, nan ta duna tur sorto di argumento bao di e capa di "seguridad, prevencion, buracheria, bringamento, criminalidad" pa marca nan punto.

Aunke henter pueblo lanta y bay contra mes, e pueblo no por gana NUNCA.

Esey a pasa cu oldmask parade.

President di SAC mes a expresa un tempo cu SAC a para esaki pasobra despues di e jump up muchanan ta keda te laat riba caya.

Pa mi, esaki ta algo pa mayoman dicidi cu nan yiunan. Ta responsabilidad di e mayoman cu ta laga nan yiunan bay e jump upnan aki. Pero no ta ser bisa cu despues di eleccionnan, muchanan ta keda te laat riba caya, mientras cu jump-up ta termina pa 9.30 of maximo 10 or y eleccionnan 12 or of 1 or di madrugada.

E jump-up nan mester bini

back pa tene e pueblo den ambiente carnavalesco, y no den ambiente di rouw manera a bay e aña aki for di principio te fin di carnaval.

POLISNAN DEN CARNAVAL

Mi a menciona un punto riba polis mas ariba mustando cu "Carnaval ta polis".

E no ta den man di ningun hende of organizacion mas pa hopi aña.

Polis semper por cay back riba e argumentonan menciona ariba, agrega cu falta di personal, overtime, sosiego, tranquilidad etc.

Ta mas di 30 aña caba ta argumenta esaki, aunque bin gruponan nobo di 10 polis acerca tur aña mes.

Cu polis ta haci un trabao formidable durante actividadnan y durante paradanan y despues di actividadnan y paradanan, esey tur hende sa y tur hende ta kita sombre pa nan.

Pero pa impone e poder riba tur cos, y cu actitud di poder cu por a mira despues di parada di diadomingo na algun lugar, y parametro di festeho di carnavalistanan, ta cos cu mi no por bay di acuerdo cune pa "celebracion di Carnaval".

Carnaval no a termina 3.30 or diadomingo atardi.

Ta polis ta caba carnaval siendo cu carnaval ta te diamars anochi 12 or.

Pero asina cu parada caba di pasa 3.30 or of 4 or, Aruba ta cay den sentimento di luto.

Stipulacionnan cu tin y reglamentonan cu tin di parti di polis ta caba abruptamente cu e celebracion di pueblo.

Pasobra parada a caba bo no mag sigui toca musica mas ni balia, ni riba acera.

A...y..B.]...Autonan di polis ta yega y un grupo di polis ta sali CU KLOP den man pa ponebo stop di toca 5 or atardi.

Esnan cu sigui balia riba caya cu of sin trafico, ta haya polis RAZO riba nan pa nan stop cu nan fiesta eynan, mientras cu 20 meter mas leeuw coleganan polis liber e dia ey si ta sigui cu nan fiesta y ningun hende a mira.

C....]....Un grupo kier sigui balia riba un pida caminda cu no ta caminda principal. Tur rond ta cera pa parada. Trafico no por sigui.

A habri camindanan, pero grupo ta pidi pa usa un pida cu nan por cera cu e baricada na dos banda y sigui goza sin causa problema di

trafico y sin causamolestes. Esaki a bira dolor di cabez pa polis, mientras cu e pida ey lo no kita nada afo di fluho di trafico of seguridad di trafico, pero no mag y That's it!

Tur hende ta bao di impresion cu nan por sigui goza y fiesta faltando dos dia mas pa carnaval termina.

Ningun hende NUNCA a bisa cu asina cu parada caba e baliamento y tocamente mester stop, ni riba acera ni riba caya. (si nan a bisa asina sigur tur hende lo a lanta protesta, pesey kizas a keda keto).

Parce cu e comprension, e flexibilidad di polis a termina cu fin di parada 4 or pa 5 or, pasobra a parce cu e mentalidad a cambia mes ora.

Befehl ist Befehl!!

E mentalidad a cambia?

Pasobra si e condicion di trabao di polis tabata cu bon ambiente y si no tabata tin asina tanto frustracion y pleitamento entre colega y

colega, y si no tabata tin asina tanto presion riba nan y tanto stress cu nan ta pasando aden, mi ta sigur cu ningun polis lo a cambia.

Si nan mester a traha mes te su dia siguiente, nan lo a hacie cu placer conociendo e pueblo y nan celebracion cu ta un biaha pa aña.

Esaki tambe ta un punto cu "Comision Vision 2000" lo mester delibera ariba profundamente ya cu polis tambe ta representa eyden. Si tin reglamento, bin cu esaki.

Si tin medida, bin cu esaki.

Si fiesta a caba ceynan, bisa e publico di antemano.

FINAL DI PARADA

Tur hende tabata bao di impresion cu final di parada lo ta na Licores, y a resulta cu ta na yegada na DOW.

Kico a bin haya?

Tur participante cu a caba ta dicidi di cana bin pariba pa bay wak e resto di parada.

Si ta tres grupo di 200 hende

a caba, ta mas o menos 600 hende ta cana bin pariba topa mey mey di caya cu gruponan cu ta balia bin pabao, kibrando e gruponan, y asina tambe kibrando e parada.

Mirones cu ta mira esaki ta dicidi e ora ey di "join the party" y prome cu bo sa tin

algun mil hende bruha den otro mientras cu ni mitar di e parada no a yega su final ainda.

Si un of otro delito a tuma lugar si, lo a bin tende di e publico of mirones yen di bitter den nan culpa, e cantidad di alcohol cu ta ser bebi, e publico cu no por comporta su mes, y e malcra cu e publico ta.

Nada lo ser bisa di esnan cu a dirigi e parada "a la careda di cabay" y a dicidi cu "aki ta final, y ningun hende tin nada di bisa!"

(den edicion di mañan lo bin cu e di 2 parti y final di e analisis)



Andrine Galisteu, amiga di campeon di formula uno Ayrton Senna cu a perde su bida na Italia, ta baliando aki den sambodromo durante presentacion di school di samba Portela. Director di school di samba Pasarela del Samba, ta un di esnan cu a perde su bida den e carnaval aki, muriendo di atake di corazon. (foto satelite AFP)



Marina dos Santos, reina di Tambor di school di samba Viradouro ta dunando su presentacion den sambodromo di Rio de Janeiro. Viradouro a participa cu 4500 miembro, y seis carosa. Viradouro hunto cu Mocidade y e school di samba Imperatriz ta favorito pa gana e titulo (foto satelite AFP)